



Memoria xustificativa do acordo de colaboración entre a Consellería de Medio Ambiente, Territorio e Vivenda, a través do Laboratorio de Medio Ambiente, e a entidade pública empresarial Augas de Galicia para a realización de mostraxe, análise e aplicación de índices de valoración necesarios para o proceso de avaliación do estado das masas de auga

1 Augas de Galicia, entidade creada pola Lei 9/2010, de 4 de novembro, de augas de Galicia, cuxo estatuto foi aprobado polo Decreto 32/2012, do 12 de xaneiro, é unha entidade pública empresarial do sector público autonómico de Galicia, adscrita á Consellería de Infraestruturas e Mobilidade, con personalidade xurídica propia e plena capacidade de obrar para o cumprimento dos seus fins, que ten por finalidade, entre outras, a preservación e mellora do medio ambiente e, en particular, dos ecosistemas acuáticos.

Augas de Galicia, conforme a Lei 9/2010, de 4 de novembro, ten entre outras as seguintes competencias: as actuacións necesarias para a implantación das directivas comunitarias e a normativa estatal, así como a coordinación co Plan Hidrolóxico Nacional; a elaboración de estatísticas e mantemento de bases de datos en relación cos usos da auga e o seguimento do cumprimento dos obxectivos fixados nas directivas comunitarias; o establecemento das directrices para a elaboración, seguimento e revisión do Plan Hidrolóxico da Demarcación Hidrográfica de Galicia-Costa; a participación na elaboración e seguimento da execución dos plans hidrolóxicos das demarcacións hidrográficas competencia da Administración xeral do Estado cuxo ámbito territorial afecte a Galicia; a análise e o control da calidade das augas, así como o seguimento dos programas de calidade da auga que se establezan.

Para o desenvolvemento destas competencias é de vital importancia a toma de mostra e a análise de parámetros das redes de control de vixilancia e operativa das augas continentais, costeiras e de transición da Demarcación Hidrográfica de Galicia-Costa. Isto precisa de tecnoloxía e dos medios axeitados para permitir este traballo, dos que carece Augas de Galicia.

2 A Consellería de Medio Ambiente, Territorio e Vivenda exerce, entre outras, as competencias e funcións en materia de avaliación e control da incidencia que sobre o ambiente provoque a actividade humana, o fomento de sistemas e estratexias de corrección da dita incidencia, a avaliación dos efectos de determinados plans e programas no ambiente, o impulso da investigación ambiental e o desenvolvemento tecnolóxico e a súa posta en marcha para o logro da adecuada protección ambiental e o desenvolvemento de estudos e informes en materia de ambiente.

Para o desenvolvemento das súas funcións a Consellería de Medio Ambiente, Territorio e Vivenda conta co Laboratorio de Medio Ambiente, pertencente á Dirección Xeral de Calidade Ambiental e Cambio Climático





(DXCACC), cuxas competencias a teor do establecido no Decreto 164/1999, do 27 de maio, son a realización de estudos, análises e informes técnicos sobre establecemento de parámetros, técnicas e procedementos analíticos previstos nas normas ambientais e a realización da labor de investigación das técnicas e modelos de análises en consonancia cos avances científicos e as disposicións normativas aplicables.

3 O obxecto deste acordo é regular a cooperación entre as partes asinantes de cara a unha adecuada programación e desenvolvemento da análise e xestión das redes de control definidas no Plan Hidrolóxico da Demarcación Hidrográfica de Galicia-Costa.

4 Para os efectos sinalados, o 11.04.2019 formalizouse coa Consellería de Medio Ambiente, Territorio e Vivenda o acordo de colaboración arriba referido que ten efectos dende o 12.04.2019 ata o 31.12.2019.

5 De conformidade co establecido no artigo 14.3 da Lei 14/2013, do 26 de decembro, de racionalización do sector público autonómico, Augas de Galicia compensa parcialmente á Consellería de Medio Ambiente, Territorio e Vivenda polos gastos nos que incorre para a realización de determinados traballos descritos na cláusula segunda do acordo, en concreto dos seguintes:

- Análises de sustancias perigosas e prioritarias.
- A metade dos gastos para a realización da toma de mostras, en concreto os custos seguintes: do material necesario para a realización da toma de mostras, do mantemento e calibración de instrumentos de medida in situ, e dos medios de transporte para a toma de mostras de augas costeiras e de transición.

Os gastos que asume o EPE Augas de Galicia estímase nunha cantidade máxima de 531.997,50 €. A orixe dos fondos está na aplicación da Consellería de Infraestruturas e Mobilidade 08.01.542A.740.01, proxecto de gasto 2019.00008. As aplicacións de destino da Consellería de Medio Ambiente, Territorio e Vivenda son 07.02.541E.6231, 07.02.541E.6331 e 07.02.541E.6401, proxecto de gasto 2014.00690; coa seguinte distribución

07.02.541E.6231	106.300,00 €
07.02.541E.6331	319.297,50 €
07.02.541E.6401	106.400,00 €
TOTAL	531.997,50 €

As citadas cantidades inclúen, todos os impostos, tributos e taxas que, no seu caso, cumpra aplicar.





A Consellería de Medio Ambiente, Territorio e Vivenda faise cargo do resto dos gastos que levan consigo a realización dos traballos descritos na cláusula segunda do acordo que non asume Augas de Galicia. Estes traballos están valorados en 653.717,00 €

6 O acordo de colaboración formalizado fundaméntase no seguinte:

A Lei 14/2013, de 26 de decembro, de racionalización do sector público autonómico, que ten como obxecto a racionalización de todo o sector público autonómico e da actividade administrativa e a adopción de medidas dirixidas a unha maior eficiencia do gasto e a mellora da xestión do sector público autonómico, regula baixo estes preceptos a colaboración no ámbito do sector público autonómico.

En concreto, o artigo 8 desta lei regula a autoprovisión de bens e de servizos dentro do propio sector público, segundo o cal a Administración xeral da Comunidade Autónoma e as entidades instrumentais do sector público, coa finalidade do uso eficiente dos recursos públicos existentes, realizarán as tarefas de interese público que lles corresponden cos medios persoais, técnicos, materiais e de calquera outro tipo dos que dispoña o sector público autonómico.

Para estes efectos, cando os medios dos que dispoñan resulten insuficientes para o cumprimento e a realización dos seus fins institucionais, acudirán con preferencia á cooperación, colaboración e asistencia doutros órganos da Administración xeral da Comunidade Autónoma ou doutras entidades do sector público autonómico que si dispoñan dos medios dos que precisan.

Pola súa parte, o artigo 14 da Lei 14/2013, do 26 de decembro, de racionalización do sector público autonómico establece a posibilidade de que a Administración xeral da Comunidade Autónoma de Galicia e as entidades do sector público autonómico formalicen acordos de colaboración ou cooperación para o servizo aos intereses xerais mediante o desempeño conxunto de tarefas de interese público da súa competencia.

Santiago de Compostela,

A directora de Augas de Galicia

Teresa María Gutiérrez López

(documento asinado dixitalmente)

